

14

DISSERTATIO MEDICA  
INAUGURALIS,  
DE  
PHTHISI PULMONALI.

QUAM,  
ANNUENTE DEO TER OPT. MAX.

*Ex Auctoritate Magnifici Reſtoris,*

D. JOANNIS ORTWINI WESTENBERGHII,  
J. U. D. ET JURIS CIVILIS ROMANI ACHODIERNI IN ACADE-  
MIA LUGDUNO-BATAVA ANTECESSORIS ORDINARIJ;

NEC NON

*Ampliſſimi SENATUS ACADEMICI Conſenſu,  
& Nobiliſſimæ FACULTATIS MEDICÆ Decreto,*

PRO GRADU DOCTORATUS,

Summiſque in MEDICINA Honoribus & Privilegijs  
ritè ac legitimè conſequendis,

*Publico & Solemni Examini ſubmittit*

JOHAN HERBERT GRAVER, Gocha-Clivenſis.

*Ad diem 12. Septembris 1725. hora locoque ſolitis.*




LUGDUNI BATAVORUM,  
Apud CONRADUM WISHOFF. 1725.





DISSERTATIO MEDICA  
INAUGURALIS.  
DE  
PHTHISI PULMONALI.

P R O O E M I U M.

um tandem ordo ad me pervenerit, ut ad gradum Doctoratus adspirem, nulli vero ad hosce honores capeffendos via pateat, nisi prius suorum laborum edat specimen; hinc & ego, licet invitus, ad hoc præstandum me accingam: invitus, quoniam hoc fertili sæculo, ubi Medicina ad summum fastigium evecta est, omnia fere exhausta videntur, sic ut eandem cram- bem recoquere teneat.

Cum vero nova hic non requirantur, & Medicinæ studiosis, in arte nondum exercitatis nec firmatis, impossibile sit nova proferre; igitur L. B. hic quoque a me nil novi, sed prius a Præceptoribus hausta, exspectet. Elegi materiam de Phthisi Pulmonali, morbo illo funestissimo, quo tot inter mortales, imprimis divites, delicate nimis viventes, hujusque sæculi deliciis dediti, trucidantur, ubi vix medelæ, imo sæpe vix palliationi locus superest; ne vero in nimiam molem hæcce dissertatio incre scat, solummodo de Phthisi Idiopathica agere decrevi.

Omnia vero, quæ forsàn bona hic vides, non mea sunt, sed Viro Celeberrimo, hujus Athenæi Lumini, HERMANNO BOERHAAVE debentur. Adeat L. B. Viri Magni incomparabilem libellum de cognoscendis & cu-  
ran-



randis morbis, ubi omnia hæc habentur; imo hæc, quæ addita sunt, in privatis humanissime, & ut solet, summo cum candore communicavit idem Vir Egregius: pauca vero Auctores fide digni subministrarunt.

Quæ prius præmonere & publice fateri me obstrictum fuisse putavi. Si itaque in concinnando ordine in exaratione materiæ erraverim, hæcque omnia nimis rudi calamo conscripserim, L. B. quaeso, ignoscat, quæ deficient, suppleat, quæ minus recte intellecta & proposita, corrigat, hæcque omnia æqui bonique consulat. Vale.

## C A P U T I.

### Etymologia Vocis & Definitio.

#### §. I.

Cum de hac materia tractare decreverim, primo, more solito, derivatio nominis, ejusque significatio tradenda.

§. 2. Φθίσις, ἄπο τῆς Φθινῆς, quod idem significat ac consumo, tabesco, hinc & Tabes dicitur, vel ἄπο τῆς Φθειῆς corumpo, hinc & Φθὴν dicitur, quod Foësius in œconomia Hippocratis pro colliquatione & imminutione corporis cum ulcere interpretatur, sic ut videatur magis proprie indicare morbum, de quo in præsentiarum sermo erit. Loci denominationem addidi, quia puto, æque oriri posse ab ulcere alterius visceris, per metastasin in pulmones delato.

§. 3. Medici hunc morbum definiunt, quod sit: *Consumptio totius corporis, ab ulcere pulmonis nata.*

§. 4. Hic est character, quo se ab aliis distinguit. Nam licet Atrophia nonnullis idem significet, errant; nam A-



trophia est simpliciter nutritionis defectus: sic & Cachexia cum nostro affectu coincidere videtur, quæ est depravatus habitus totius corporis. Verum uterque morbus differt, quod ulcus pulmonum non adsit; sic ut Atrophia & Cachexia, imo & Marasmus Veterum, consumtio cum ariditate, in omni Phthisi observetur, quæ solo ulcere se distinguit.

§. 5. Diximus in definitione, esse *consumtionem totius corporis*: quia in hoc morbo æger ita extenuatur, ut solis tendinibus & ossibus videatur constare, imo vix supersit pristina, sed modo mortis imago, instarque sceleti viventis appareat.

§. 6. Non vero secundum vulgi sententiam de solidis, musculis, fibris, nervis, tendinibus & ossibus hic aliquid consumitur, sed sola pinguedo, a qua præpondium obesi præ non obeso dependet. Nam membrana adiposa, quæ ubique in corpore supra musculos invenitur, intra illos, illorumque fibras ubique se insinuans, in immensam fere molem pinguedine, vel aqua, vel aëre impleri distendique potest: hinc, hac membrana pinguedine orbata, nec interim aëre vel aqua infarcta, mirum in modum homo extenuatur, & quasi totus consumitur. Veruntamen in Phthisi consummata vasa quoque exsucca redduntur, ut in horum cadaverum dissectione patet, in quibus sæpe vix aliquot unciae sanguinis inveniuntur; nil vero de solidis perit, nam æque omnes musculos, ac alius sanus homo, cum agilitate & quadam facilitate, licet non tanto cum robore, movere possunt, nisi quod ossa mutuo contactu, a smegmate Haversiano inungente & lubricante privata, supra invicem plerumque crepitent.

§. 7. Consumtionem illam in Phthisi dependere *ab ulcere pulmonis* statuimus; *ulcus* vero Medicis definitur *esse solutionem continui, factam in partē molli cum generatione puris*. Cui definitioni explicandæ non immorabor, nisi solummodo dicendo, pus esse productum, vitæ superstiti tribuendum, constans ex aggregato vasorum contritorum & materia liquida ad locum allata: hæcque actio simul hæmorrhagiam, a vasis abscissis timendam, præcavet; hinc hic vitæ effectus, quo se ab omni heterogeneo & a majori morbo liberat, non



adeo timendus, est solius naturæ benignum opus, nam videmus in hominibus ulcera continuo fluentia habentibus, natura, id est, vi vitæ deficiente, hæc exficari, notatque, ut vulgus novit, mortem non longe abesse; sic quoque in Phthificis, sputis suppressis, mors in propinquo: ita ut jucundum illud naturæ auxilium, si puri cocto exitus modo dari posset, locusque mundari, (dicta vero non intelligenda de ulcere saniem seu ichorem fundente) sæpe expetere deberemus.

§. 8. Sed cum hic habeamus molles pulmones, & manui accessus non detur, nec mundatio ita procedat, sane alia est ratio. Nam Pulmo, organum capitale, laborans pro toto corpore, *αἱματοποιητικὸν*, & *πνευματοποιητικὸν*, omnem sanguinem chylo & lymphæ permixtum transmittens, permixtum in liquidum nutriendo aptum, hic laborat, cujus descriptionem & efficaciam in corpore, brevitati studens, hic modo, ut alibi ab Anatomicis descriptam, & in Theoreticis demonstratam, assumo, & suppono, hoc viscus esse, quod omnem sanguinem totius corporis una cum chylo & lymphæ accipit. Eodem enim tempore, quo humor ille vitalis semel per omnia viscera partesque corporis cunctas circuitum absolvit, idem omnis per solos Pulmones transit, & quantum per totum corpus distribuitur, tantum intra idem tempus per pulmones trajici debet, sic ut nulla particula totius nostræ Machinæ ullam guttam sanguinis arteriosi accipiat, nisi prius per Pulmones fluxerit: imo ipsi Pulmones accipiunt sanguinem, vi propriæ fabricæ prius subactum, unde vivificantur & nutriuntur, sic ut hic fiat maximus humorum affluxus, horumque celerrimus trajectus.

§. 9. Accedit motus continuus, non interpolatus respirationis, inde Pulmo ne quidem per momentum in perfecta quiete est, nam systema aëreorum vasorum, inspirando aërem, inspiratum retinendo, continuo dilatatur, expirando iterum collabitur, nec per hæc tria momenta Pulmo quiescit, sed semper movetur dilatatione aëreorum vasorum per gradus, horumque iterum sic collapsu, sicque ut vasa & humores in vasis contenti ne quidem per momentum in eadem maneat  
pres-



pressione. In inspiratione enim spatia inter singulos ramos bronchiorum fiunt majora, & vesiculæ coecæ, ex quibus pro magna parte Pulmo quoad aërea vasa componitur, dilatantur, quo vero magis dilatantur, eo magis ad figuram sphæroideam, cujus natura est, ut se modo in uno puncto tangat, accedunt. Cum vero hic inter has vesiculas vasa in reticulares plexus distribuuntur, hæc eo magis humores admittere possunt; hinc quo distensio vesicularum major, quæ successive usque ad ultimum momentum inspirationis augetur, eo vasa libera evadunt: in expiratione vero successive hæc figura sphæroidea perit, vesiculæ complanantur, spatia inter singulos ramos bronchiorum fiunt minora, & vasa per gradus iterum comprimuntur, sicque vasa hic ex majoribus per gradus mutantur in minora & minima, & sensim iterum relaxantur. Hic ita se offert nobis compendium omnium vasorum, quorum capacitas ab aëre irruente, & vesiculas distendente, augetur, ab aëre vero egrediente, vesicularum collapsum efficiente, minuitur, accedente summa hac velocitate, qua humores hic ferri debent: exinde facile unicuique, accurate hæc perpendenti, patet, hic summam omnium humorum fieri conquassationem, attritum maximum, & attenuationem, caloremque summum generari, sic ut humores omnes hic maxime adaptentur fluere per omnia vasa, hisque inducatur figura nutriendo apta, & ex chylo compacto sanguis paretur; ita ut cum sanguine reliquo, ex Pulmone iterum egrediente, unum homogeneum liquidum rubrum constituat. Est ergo Pulmo præcipuum *αἱματοποίησις* organum, ibique humores omnes densantur, specificè graviores redduntur a vi vasorum, adjuta motu respiratorio: & hæc compactio videtur colorem rubrum sanguini inducere.

§. 10. Ex hisce dictis patet, quare tam periculosum sit, quando hoc viscus suppuratione laborat, cum eo tot humores confluant, & præterea motus continuus accedat, qui vulnervis & ulceris concretioni maxime obest, sic ut vix consolidetur, nisi perfecta imperata quiete. Et hinc, quia actio hujus visceris communi bono adeo necessaria, ratio clara est,

cur



cur totus homo ab ulcere hujus visceris ita extenuetur & consumatur.

## C A P U T II.

### *De Causis.*

#### §. 1.

**H**isce paucis de morbi definitione & historia prælibatis, jam mali causa indaganda.

§. 2. Causa proxima est omnis illa, quæ sanguinem humoresque in Pulmonibus ita sistere valet, ut in materiam purulentam abire cogatur. Verum hujus Causæ, quæ hoc efficere possunt, admodum sunt variæ.

§. 3. 1°. Pulmonis inflammatio suppurationem efficiens, imo suppuratio pericardii, pleuræ, mediastini, diaphragmatis, Pulmones macerando, rodendo, inque tabum fluidum convertendo, sicque pus in cavitatem Pulmonis deponendo, idem malum producit, ac si proprio ulcere consumeretur.

§. 4. 2°. Metastasis cujuscunque suppurationis in corpore, eo pus, sanguini per venas absorbentes communicatum, deponere, eundemque morbum efficere valet. Verum hæ species sympathicæ proprie dicendæ: & cum hic de Phthisi Idiopathica, magis proprie Pulmoni adscribenda, agere decreverim, eas brevitati studens mitto.

§. 5. 3°. Causa Idiopathicam Phthisin produciens est duplex:

( $\alpha$ ) Debilitas viscerum & vasorum, imprimis Pulmonis.

( $\beta$ ) Humor qualitate & quantitate peccans.

§. 6. Hæc duo produciunt, 1°. Hæmoptoën; 2°. Consumptionem Anglicanam BENNETO dictam, in qua Pulmo ita debilitatur, ut ingesta non compingantur, sed omnia perfluant, & sudoribus materiam præbeant: & ita Marasmmum verum accipiunt, &



& sæpe sine Hæmoptoë, sine sputis purulentis, si nulla causa externa accedat, resolutis viribus, diem obeunt supremum. Vel sensim in Pulmones fit aggestio heterogeneorum & minus coctorum humorum, quæ & sæpe Hæmoptoën, Phthisis præmonitorem BENNETO dictam, producit. Imo lis magna inter Auctores, an quis Tabe possit resolvi sine cruenta excreatione, quam litem dirimere nolo.

§. 7. Hæc autem Hæmoptoë vera, vel a Consumptione Anglicana, si jam præsens in ægro, vix Phthisis vera, eaque vix curabilis averti potest; sic ut omnis cura hic consistat in prophylaxi, hinc causæ Hæmoptoës erunt & causæ Phthiseos. Ergo hæ paulo altius evolvendæ, & distinguendæ

A. In Proëgumenas, &

B. Procatarcticas.

§. 8. A. Proëgumenæ sunt: (a) Nativitas ex familia Phthisica, parentibusque debilibus; nam his cum labe seminali communicatur, hique miseri, proh dolor! hæreditario jure incidunt in Hæmoptoën & Phthisin, nulla fere arte curandam, nisi, priusquam Hæmoptoë oriatur, summa cum cautela præcaveatur: vel sine Hæmoptoë prægressa, Phthisici deveniunt.

§. 9. (b) Temperies plethorica utcunque calida & cacochymica, quæ plerumque oritur circa illam ætatem, ubi homo ἀκμὴν sui incrementi attigit, ubi corpus non magis crescit, ossaque ulteriori productioni resistunt, nec tantum nutritioni corporis impenditur. Hinc HIPPOCRATES in *Aphorismis* dicit, quod *Juvenes sanguinis spuitionibus maxime sint obnoxii*. Alio loco, quod *Tabe maxime fiat ætatibus ab anno octavo decimo usque ad quintum trigesimum*. Hinc hi homines in flore ætatis demetuntur, imprimis cum hæc ætas maximos in diæta committit errores.

§. 10. Cum vero in Phthisin prædispositi sint valde debiles, ita ut viscera vasaque corporis, unde mutatio crudi in coctum, suo non fungantur officio, & hinc ingesta nimis tenacia, adeo ut a virtute corporis superari non possint, sed spontaneam, a calore & liquidis admistis dependentem, muta-

B

tio-



tionem patiantur. Hinc acida non mutantur in alcaliscentem naturam, ut fieri deberet, aciescentia fiunt acida, alcaliscentia redduntur fere alcalia; ita ut variæ degenerationes fiant, & tandem in putredinem vergant: sic nascitur Cacochymia, & accedente solidorum debilitate, quæ causa fuit Cacochymia, facile fit horum dissolutio. Hæc quoque causa est Consumtionis Anglicanæ, de qua BENNETUS, Auctor ille heteroclitus quoad stylum, notat, quod *ἐν πεπτω tenellis & invalidis sit alimonia amicabile, sed eadem rustico porrecta in bilem retorridam facefant; si vero ei des caseosa, & e carne bubula, vel solidioris consistentiæ, in nutrimentum vergunt commodissimum, nam ut labor sic cibus; si vero eadem des teneioribus, inde male se habent, & in Consumtionem Anglicanam incidunt, ubi cruda minus cocta in pulmonibus aggregantur & accumulatur, unde Pulmo oneratur, imo stagnando acria redduntur, quia hærent in loco calido aëri proximo. Verum si tenuia alimenta accipiunt, omnia perfluunt, unde nimia diaphoresi & sudoribus exhauriuntur; quoniam actio viscerum vasorumque languet, hinc nulla fit humorum compactio, & vix sanguis bonus conficitur, quare si chylus ad Pulmones defertur, solent anhelare & leviter tussire; si igitur in tali homine oritur Hæmoptoë, est malum funestissimum.*

Hæc sunt, quæ de temperie ad Phthisin dicenda habui.

§. 11. B. Jam ad causas Procatacticas progrediendum, quæ, ubi prædispositis applicantur, facillime Hæmoptoën & Phthisin creant: hæ sunt omnia illa, quæ 1°. abundantiam humorum cum acredine junctam generant & augent, ut sunt:

(α) Omnes excretiones consuetæ, vel a natura factæ, vel ex arte institutæ, imprimis sanguinæ, intermissæ.

(β) Diæta nimis calida, acris, aromatica, maxime salina, & fermentata vinosa, & spirituosæ &c. quæ omnia motum sanguinis augendo, sanguinemque rarefaciendo, acremque reddendo, morbum accelerant, imo sæpe producant. Novi enim juvenes, ab usu nimio spirituum ardentium sine prædispositione, ut videbatur, robusto corpore existente, in-



cidisse in Hæmoptoën & Phthisin, maxime si animi moeror accedit, sic ut MORTON in abusu hujus, una cum curis coeterisque animi affectibus juncto, usitatissimam causam Phthiseos statuatur. Sane non mirum, cum ab horum usu prima officina primo quidem roboretur, nam nullum forsan aliud melius roborans, si summo cum moderamine usurpatur, sic primo initio sæpissime inde pinguescunt; sed quia plerumque simul acribus indulgent, abundantiam sanguinis, sed acrioris, generant, sicque in Hæmoptoën incidunt, vel hujus usu quotidie aucto, ut plerumque fieri solet, quia ejus amore mirum in modum capiuntur, officina prima quasi comburitur, & occallescit, vasaque intestinorum contrahuntur, & sic tantummodo in primam agunt officinam, nec reliquum corpus inde roboratur. Hinc prima coctio depravatur, hac depravata reliquæ non bene procedunt: hinc si tum Pulmo in proportionem præ coeteris visceribus paullo debilior, imo licet in initio satis fortis, tamen inde primum incommodum sentit; quia omnem chylum, non satis prima coctione præparatum, accipit: acrimonia igitur accedente, ejus vascula eroduntur, oriturque Phthisis vix medicabilis. Cum ergo hæc in corpore non prædisposito Phthisin producant, potiori jure in prædispositis malum accelerare dicuntur.

(γ) Dein morbi omnes, in quibus salia exaltantur, humores acuuntur, circulatio vehemens, calor & rarefactio magna, similem producant effectum, maxime in prædispositis: hinc febres acutæ, variolæ, pestis, & imprimis scorbutus calidus, ubi acre peccans tenuia vasa colliquat roditque; hinc & catarrhus acris, ad Pulmones depluens, prædispositis adeo nocet, imo homines frequenti & diuturno catarrho & affluxu perenni ad Pulmones, una cum tussi affectos, ob Pulmones labefactatos, inde in Hæmoptoën & Phthisin, non tamen tam cito exitialem, incidisse testantur Auctores.

§. 12. 2°. Accedunt animi affectus magni, qui imprimis in prædispositis nocent, maxime ira, quæ juxta Veteres furor brevis est, motum & calorem in corpore auget, hinc hi



homines incandescere dicuntur, moeror anxietasque animi, nam inde maxime pulmones onerantur, unde juxta BENNETUM, spiritus dejicitur, & vis tabifica altius imprimitur: ut de coeteris taceam.

§. 13. 3°. Quæcunque vim pulmoni magnam applicant: ut in magno nixu corporis, ubi multum aëris hauriendo, & diu retinendo, Pulmo maxime patitur, ut & in cantu, hinc cantatores in ædibus publicis plerumque Phthifici fiunt: sic & a clamore pulmoni magna vis infertur; imprimis vero a tussi, & risu afficitur, quæ actiones humanæ, quoad effectum, fere cöincidunt: nam in utraque magna copia aëris in Pulmones irruit, retinetur, it, reditque, rarefcit, nec interim exspiratur, sic organa respiratoria maxime conquassantur & concutiuntur, hinc plurimi prædispositi Hæmoptoën inter ridendum accipiunt. Huc & vulnera Pulmonis referuntur, quæ illico Hæmoptoën producant, & inde Phthisis, sed non adeo periculosa, ac si a causa interna esset producta, oritur.

§. 14. 4°. Sunt quædam causæ, quæ venenata quadam facultate hunc morbum producant, ut sunt venenati quidam vapores: ut vapor aquæ fortis, mercurii, stanni, similiumque, verum inde raro Hæmoptoë producit, nec quoque vera Phthisis, sed morbus Pulmonis heteroclitus. Dicitur quoque de lepore marino, quod, si quis eo vescatur, occulta quadam proprietate pulmonem exulceret, tabemque faciat. Huc quoque refero contagium, nam plerique Auctores testantur, hunc morbum æque contagiosum ac hereditarium; nempe si una cum Phthifico semper versamur, unaque cubamus, imprimis vero sputa foetida Phthificorum habentur suspecta.



## C A P U T I I I.

*De Signis Diagnosticiis.*

## §. 1.

**J**am signa Diagnostica sunt enumeranda, quæ, ob rationem postea dicendam, distinguenda sunt in illa, quæ  
 1°. Morbum imminuentem denunciant.

2°. Quæ præsentem declarant.

§. 2. 1°. Morbum in semine latere scimus: si homo natus ex familia Phthisica, & parentibus debilibus: si video habitum corporis in Phthisin maxime inclinantem adesse, id est, si scapulæ acuminatæ, a tergo prominentes, quasi alatæ, qui veteribus *πτερυγῶδες* dicuntur: si præcordia contracta, pectus angustum & depressum, cervix gracilior & oblonga, & quibus a capite fiunt frequentes destillationes; hæc enim omnia notant, vitalia hæc viscera, cor scil. & Pulmones angustis limitibus esse circumscripta, & sic non ita dominium, ut fieri deberet, in totum exercere posse. Si præterea videmus, vasa esse tenerrima, sanguinem acrem, tenuem rutilumque, quod ex colore faciei amoenissime roseo, per vasa tenerrima transparente, apparet: hinc HIPPOCRATES hos vocat *Φθινῶδες*, id est, qui congenitam ad tabem propensionem habent, horum totum corpus molle, totusque habitus musculorum flaccidus, horumque viscera valde debilia, imprimis Pulmo, totumque vasorum systema; proinde inertia solidorum in liquida, & sic assimilatio non bene procedit, & quæ inde mala dependent producuntur. Præterea observatum est, in Phthisin prædispositos esse summa mobilitate & hilaritate, ob vasorum teneritudinem, & sic sæpe accidit, ut inter ridendum Hæmoptoën accipiant: hinc tritum illud vulgare inter nostrates non procedit, cum dicant de homine hilari & jocosio, illum non Phthisi moriturum, cum potius hoc cadat in morosum.

B 3

Hæc



Hæc sunt signa morbi in semine latentis.

§. 3. 2°. Præsentis signa jam describenda, ubi (α) agendum de signis Hæmoptoës veræ, vix curationem admittentis, (de qua Medici sæpe gloriantur, se eam curasse, ubi modo curarint Hæmoptoën a causa externa ortam in corpore non prædisposito) cujus definitio præmittenda.

§. 4. *Hæmoptoë vera est spuitio sanguinis arteriosi, floridi, coccinei, spumantis, cum tussi, strepitu, & angustia pectoris, præcedente calore modico, levi dolore, & sapore salso in ore.*

Hæc est vera morbi hujus calamitosi descriptio, ex quo vix ægri emergunt, quin Phthifici moriantur, vel aucta hac exspuitione sanguinea, sæpiusque redeunte, purpureo cum sanguine evomant animam, imo sæpe Pulmonis substantiam sic rejiciant.

Hinc ergo ad distinguendum hoc tam exitiale malum ab aliis sputis sanguineis, definitio erit accuratius perpendenda.

§. 5. Dixi *sanguinem arteriosum*; nam venosus esse nequit, (nisi a vulnere inflicto, ubi tamen parum ex venis fluit, nisi sint magnæ) quia sanguis in venis fluit ex apice in basin. Porro nota sanguinis arteriosi est, quod sit *floridus, tenuis, simulque spumans*; hæcque indicant, si simul purus putus rejicitur, ex dextro cordis thalamo depromptum esse: *strepitus* vero notat ex Pulmonum profundo sensim prodire ascendendo, sicque *tussim & strepitum* facere: simul tum *angustiam pectoris* sentiunt, quasi pulvinarculum molle in Pulmonibus hæreret; forsan quia circulatio turbata, vel potius ob summam animi perturbationem, quia videntur animam exspuere: *sapor tandem salsus præcedens* notat acrimoniam erodentem præcessisse. Hæc sunt signa veræ Hæmoptoës Veterum per *Ἀγέρωσιν* adeo metuendæ, ubi purus putus sanguis floridus, tenuis, & spumans, cum tussi exspuitur; nam si cum vomitu sine tussi rejicitur, ex prima officina provenit.

§. 6. Si vero sputa fluunt ex bronchiali arteria, a qua, demonstrante RUYSCHIO, mucii fit secretio, tum modo parva copia sanguinis phlegmati se admiscet, quod sæpe catarrho-

sis



sis accidit. Item si ex superiori parte laryngis, partibusque vicinis stillat, quoque sanguis paucus & grumofus, cum titillatione harum partium sine oppreffione, rejicitur. In utroque casu, si nulla mala signa adsunt nec prædispositio, vix quid mali portendit, & sponte bona cum diæta cessat, nam modo per ἀνασόμωσιν fluit ex orificiis vasorum dilatatis. Nam videmus in morbis acutis, peripnumonia, pleuritide, aliisque sic critice sanguinea strigmata sputis se miscere, & naturam se ita a morbo liberare, quod BENNETUS hisce verbis innuere videtur: *Si critice, & per transsumtionem Pulmoni supervenerit affectio, tuto, non raro, & cum totius adjumento res succedit.*

Imo observatur sæpe, omni mense foeminas menstruari per Pulmonis vasa anastomatice dilatata, ut aliter in utero fieri solebat, sine magno periculo, nisi quod Pulmo inde debilitetur, & si nimius fluxus oriatur, sæpe in Αἱρίεσιν desinat: sic & a plethora fieri potest; sed hoc fluxu restituto, vel plethora imminuta, si nulla adest prædispositio, malum curatur.

§. 7. Hic vero notandum ad intellectum horum, Veteres dixisse, solida quadruplici modo liquida contenta retinenda dimittere.

1°. Per ρήξιν, ubi a causa externa membranarum vasorum fit ruptura.

2°. Per ἀνασόμωσιν, ubi vasorum orificia extrema dilatantur & dimittunt retinenda.

3°. Per Αἱμωδήσιν, ubi vasa tam tenera & rara, ut per tunicas transfudet humor.

4°. Per Αἱρίεσιν, ubi vasorum membranæ plenarie separantur a causa interna.

Primum a causa vulnerante accidit; ἀνασόμωσις vero & Αἱμωδήσις non adeo malos morbos producant & facile curantur; sed tamen, si humores coercendos vel sanguinem nimis dimittunt, in Αἱρίεσιν transeunt: hinc sputa critica, in morbis acutis sanguineis strigmatibus mixta, sunt boni præfagii, si vero purus putus cruor exscreatur, mortis prænuntia.



§. 8. Si vero *Ἀγίγεις* fit ab erosione, de qua BENNETUS dicit, quod *acria salsa non illico, quasi per terebellum vel acus partem compungant & corrodat; sed cum diu insederunt, cujus vis æstimanda potius dissolutoria, quam incidens & compunctoria*: & sic ibi perfectam erosionem describit, quod ipsi *ἀναγέωσις* Veteribus *Ἀναγέωσις* dicitur, morbus vix curabilis.

§. 9. (β) Signa præsentis Phthiſeos ex Hæmoptoë prægressa satis clara sunt. Quod si vero oritur ab inflammatione partium in thorace sitarum, suppurationem & empyema producente, vel a metastasi materiæ purulentæ ex alio loco huc depositæ, (de quibus in præsentiarum non est sermo) noscitur ex signis horum morborum prægressis, subsequentibus signis Phthiſeos.

§. 10. Signa vero Consumtionis Anglicanæ, quæ in initio non ita clara sunt, accuratius perpendenda. Hinc si videmus temperiem inclinantem in phthisin, illamque imprimis ætatem, quo corpus *ἀκμὴν* sui incrementi nactum, tum homo sentit Pulmones graves & quasi ponderosos, respirationem difficilem, parvam, anhelam, quæ omnia a motu, maxime si post pastum exercetur, exacerbantur. Tum simul actio primæ officinæ depravatur, quod ut BENNET dicit: *Ex eruptionibus acidis, amarescentibus, nidorosis scitur, si odor corporis maxime inter sudandum a consueto mutatus, cutis præsertim faciei deflorescentia, habitus corporis mutatus, vigor languescens, hæc in plerisque morbis diuturnioribus, præcipue Phthiſi, indicia sunt*; & porro dicit: *quod totius certitudo confirmetur, si aliqua de causa fluxio seu catarrhus ad articulos vel extrema corporis devenit, & inde pectus levatur*. Tum tussis sicca adest, vel cum sputis, solo concussu tussiculoso abrasis, non purulentis, illa vero tussis maxime a pastu aucta cum dejectione ciborum, vagæque adsunt horripulationes cum febricula, vix se manifestante & proditorie quasi obrepente. Hoc in casu quando pulsum exploramus, jubendo ægrum lente pulmones explicare, quam profundissime inspirare, aëremque quamdiu potest retinere, interim manum ad pulsum applicatam tenere debemus; si tum sentimus pulsum illico vacillare, hoc



hoc notat viscus quoddam male affectum, si vero æger profunde inspirare nequit, quin a tussi obrepente impediatur, pulsus vacillare & labia genæque rubere incipiunt, ea notant malum in pulmonibus hære, sicque hoc modo optime conditio bona vel mala viscerum ex pulsu detegitur. Tum simul decubitus in dorso difficilis, in uno latere impossibilis, in altero tolerabilis erit.

Hæcce signa sunt vomicæ in præternaturali cavo contentæ.

§. 11. Si malum augetur, tum tussis sicca augetur a vomica, latera Pulmonis ad invicem apprimente, unde titillatio & tussis fere perpetua, tum consumptio & febris hectica quasi amice obrepit, quæ adhuc vix se manifestat, modo calor paulo major, maxime in volis manuum pedumque cum genarum rubore, imprimis a pastu, inde & horripulationibus euntibus & redeuntibus. Inde pulmo incipit consumi in pus, vomica augetur, respiratio pessima summa cum anxietate ægrum infestat; tandem vero vomica rupta, vel (1) in cavitatem thoracis effunditur; unde, quanta syndrome malorum, facile patet consideranti. Materia enim hæc hærens in loco calido, humido, perpetuoque agitato, continuo affluxu augetur; hinc Pulmonem, cor, diaphragma, pleuramque macerat, corrodit, inque tabum fluidum convertit. Vel (2) ad aërea vasa aperitur, & sic æger præ copia sæpe illico suffocatur. Vel (3) totus Pulmo consumitur, & æger sic sine sputis purulentis moritur. Vel, (4) vomica ad vasa aërea aperta, fit continua puris cum tussi exscretio, eodem modo, ac ab Hæmoptoë prægressa fieri solet.

§. 12. Si vero pus bonum, pauca copia sine magna consumptione, manifesta febre, siti & calore, tum æger valetudinarie adhuc diu supervivere potest; sed a levissima causa Hæmoptoë recurrit: in juvenibus vero calidis cito plerumque lethale malum.

§. 13. Cum vero malum augetur, sputationes fiunt quotidianæ continuæ, cum strepitu sonoque instar horologii locularis, per momenta tempus mensurantis, ut BENNET dicit.



cit. Tum febris augetur, sputa fiunt foetida, copiosa, varii coloris, & igni imposita carnem assam spirant ob putredinem conceptam, qui foetor contagione imprudentes labefactat, hæcque sputa fundum aquæ marinæ petunt, agitataque facile dissolvuntur, quia Pulmonum substantia consumitur, omnesque functiones labefactantur, depravantur. Hæc vero febris hæctica putrida, 4 vel 5. horis a pastu exacerbatur, cum chylus novus ad vomitum vel locum exulceratum accedat, ibique obstaculum inveniens sistatur; hinc febris cum calore, rubore generum, oppressione pectoris & summa cum anxietate se manifestat. Per hanc febrem chylus, una cum inquilinis humoribus vasisque, in pus quasi coquitur, hinc maxima copia puris mane deponitur, & febris ingenti rivo sudorum solvitur, quia humores non compinguntur; nam maxima vis compingens defuit, hinc omnia perfluunt. Tum mane paulo melius se habent, sed cum iterum cibos ingerunt, eadem tragoedia redit; hinc debilitas augetur summaque oritur consumptio & macies, nisi quod pedum manuumque vasa lateralia distendantur & pelluceant, quia hæc materia tenuis ob debilitatem ad cor readscendere nequit: cæterum nil nisi mortis imago, sed mobilis. Tum æger faciem illam horrendam, Hippocraticam dictam, accipit, ubi facies livida & instar moribundi pallida, cum circulo livido circa os, oculis subsidentibus, naribus acutis, temporibus collapsis, totumque corpus redditur strigosum, sceletoque simillimum, vox rauca præ ariditate: capilli defluunt, quia non amplius nutriuntur: ungues incurvantur, quia eminentiæ digitorum consumuntur; sæpeque aphthæ præ debilitate accedunt. Vomitus a tono ventriculi relaxato; vel a miasmate purulento sanguini communicato, valde molestus; tandemque ad malorum cumulum accedit suppressio sputorum & anxietas, quia id paucum sanguinis adhuc reliquum in Pulmones agere nequit, nec Pulmones amplius distendere potest: denique naturæ ruinam promovet acceleratque diarrhœa purulenta colliquativa, & sic mors ultimum miseriarum solatium placida subsequitur.



## C A P U T IV.

*De Signis Prognosticis.*

## §. 1.

**J**am hæc, quæ de prognosi dicenda habeo, paucis absolvere potero. Prognosis hic admodum difficilis, si vera Phthisis adest.

§. 2. Verum Phthisis ab Hæmoptoë, a causa externa, vel a clamore, risu, tussi, vel a plethora sola, sine prædispositione orta, (nam tum raro in Phthisin veram Hæmoptoë transit) non adeo timenda. Sic & in foeminis sæpe accidit a fluxu menstruo impedito, ita ut omni mense, uti dictum, per Pulmones, ex vasorum orificiis dilatatis, menstruentur: ubi tamen, hoc fluxu restituto, sine ullis signis Phthiseos sanantur, & modo Pulmones bene se a sanguine repurgent, & vasorum non nimis dilatentur orificia, ita ut dilaceratio fiat, nullum periculum subest. Eadem quoque est ratio in aliis sanguineis excretionibus retentis, id quod BENNET his indigitare videtur, inquiens: *Sanguis per vices in pectus confertim fluens minus periculosus, quam qui sensim & jugiter emanaverit; fluxio enim periodica, licet copiosior, ἀναστροφικὴς; jugis pedetentim facta ἀναεργικὴς symptoma.* Ubi illa periodica excretio nulli alii causæ, quam Plethoræ extrema vasorum nimis dilatanti ortum debet. Idem Auctor mox subnectit: *Extravasatio sanguinis ex redundantia & tensione facilius curatur, quam illa, quæ ex ejus alienatione & erosione ortum duxerit.*

§. 3. Sic & Hæmoptoë a superiore parte laryngis, vel ex bronchiali arteria depluens, nil mali portendit; nam hoc catarrhosis sæpe accidit, ut sputa sanguineis strigmentis tincta sint.

§. 4. Cum vero a tali causa externa, vel a vulnere infl-



cto, sine prædispositione Phthisis oritur, licet ulcus Pulmonum semper curatu sit difficillimum, ut HIPPOCRATES dicit: *A sanguinis sputo puris sputum malum*; ob perpetuum Pulmonis motum, humorum affluxum, pulmonisque molitiem, & quia depurgari rarissime potest sine tussi, magis adhuc lædente, medicamenta vero integris viribus loco affecto applicari non possunt, hinc semper summa cum cautela talis æger tractandus.

§. 5. Si vero tum sputum liberale, sine labore, & valida tussi, album, coctum, æquale, non nimis copiosum, sed ulceri respondens, sine signis febris, quæ sitim facit, & coenam prohibet: si omnia naturalia bona, appetitus bonus, digestio bona: si nondum extenuatur: si excrementa alvi dura semel de die deponit, ea enim bonam digestionem testantur: si respiratio libera, vires constantes. Hæc modo enumerata, in quocunque ulcere, ex quacunque demum causa orto, hic adhuc aliquid boni promittunt: imo spes curæ affulget, vel saltem vita per plures annos protrahi potest, servata imprimis diæta diligenti & accurata, & medicamentorum prudenti applicatione.

§. 6. Contraria vero, si in ægro observantur, nil nisi mali præ sagii: & quo plura contraria, eo peioris, & contra.

§. 7. Phthisis Metastatica prognosin morborum, unde ortum duxit, sequitur: estque facilius curatu, quam si in prædispositis a male affecto Pulmone oritur; peior vero morbus est, si inflammationi Pulmonis subsequitur, tamen adhuc spes curæ. Si vero suppuratione partium in thorace sitarum, pus in cavum thoracis deponendo, ortum duxerit, morbus est vix curabilis: verum de his in præsentiarum silere decrevi.

§. 8. In genere notamus, quod ver, imprimis vero autumnus tabidis sit infestissimus; hinc plerumque sub autumno moriuntur, ob aëris nimias mutationes, imbresque frequentes.

§. 9. HIPPOCRATES dicit: quod *Tabes maxime oriatur ab anno decimo octavo ad trigesimum quintum*, ob rationes datas.

§. 10.



§. 10. Dein observatum, mulieres esse in Tabem propensiores; quia summæ mollitiei corporis & flacciditatis sunt, & facile plethoram generant.

§. 11. Notandum quoque, quod semel Hæmoptoën passi, facillime a levi causa recidivam patiantur: imo si sic it, reditque, vel repente ex nimia sanguinis jactura, veluti jugilati, intereunt, vel Phthifici fiunt.

§. 12. Porro Phthisis, ab Hæmoptoë per erosionem inducta, post annum 36 oritur, omniumque difficillime curatur; quia tum Pulmo compactior, & non ita consolidatio, ac in junioribus, procedit: nam, teste HIPPOCRATE, morbi in senectute difficiliter curantur, quam in juventute.

§. 13. *Tabidorum languor sine Pulmonum aut visceris cujuslibet corruptela, tacita vi obrepens, Anglis infestissimus est, & nisi primis remediis obdiderit, (quod rarissime evenit) funestus,* inquit BENNETUS. Ubi videtur innuere morbum illum, de quo supra, in quo omnia perfluunt, nulla fit assimilatio, nullaque humorum compactio: hinc omnia diaphoresi avolant, & sudori materiam præbent, summus oritur Marasmus & sine Hæmoptoë, vel sputis purulentis, mors subsequitur.

§. 14. Ab ingestis nimis tenacibus, vitæ & Pulmonum viribus vix superandis, quod si Pulmo oneretur, & congestio fiat sensim & lente aucta, tum ipsius sæpe cum suffocationis metu fit ruptura, vel oritur Phthisis.

§. 15. In tali corpore, vel in casu paulo ante notato, si oritur Hæmoptoë, vix admittit curam, imo sæpe vix palliationem. Sic & si ab Hæmoptoë per *Ἀναστροφὴν* in corpore prædisposito Phthisis oritur, vel jam præsens, tum morbus vix medicabilis; nam ulcus tum fit, quod non facile consolidatur, & vitium humorum & solidorum vix corrigitur: imo actionem, quam Pulmo in nostro corpore pro communi bono totius machinæ præstat, supplere non possumus.

§. 16. Hæreditaria Phthisis in semine latens, æque ac barba suo tempore in viro nascitur, etiam in Pulmone oritur, & plane quidem incurabilis, nisi curetur cum præcautione Hæmoptoës: de quibus tamen BENNET dicit, quod



licet irrestituibiles, sint tamen diuturniores; Veteres enim dixerunt hæreditarios morbos curari non posse, nisi totus homo mutetur.

§. 17. Denique, si febris hæctica jam adest, sudoresque nocturni, sputa matutino imprimis tempore copiosa, gravia, foetentia, dulcia, quæ corruptionem & consumptionem substantiæ Pulmonis notant, actum est de ægro. Quo vero hæc omnia symptomata velocius procedunt, & majora sunt, eo citius lethalia. Denique, si capilli de capite defluunt, si sputis suppressis diarrhœa succedit, mors in propinquo est, ut HIPPOCRATES hæc sparsim in *Aphorismis*, & *Coacis* confirmat.

Hæc de prognosi sufficiant, reliqua ex diagnosi patent.

## C A P U T V.

### *De Curatione.*

#### §. 1.

Jam de cura hujus funestissimi mali agendum, quæ, ut ex præmissis facile patet, est distinguenda

1<sup>o</sup>. In curam prophylacticam dictam, a morbo in semine latente præservantem.

2<sup>o</sup>. In curam morbi jam præsentis.

§. 2. I. Ad primum quod attinet, respiciendum  
*Cura morbi* ad signa in diagnosi data. Hinc si videmus  
*imminentis.* juvenem, ex parentibus Phthificis natum, qui prædispositionem, habitumque corporis prius descriptum, inclinantem in Phthisin, simulque temperiem plethoricam, vasa tenera sanguineque rutilo impleta, cum colore amœne roseo transparente, habet, & jam ad *ἀκμὴν* sui incrementi accessit, tum illico summa ope annitendum, ut Hæmoptoë præcaveatur; nam hac jam præsentem vix Phthisis im-



immedicabilis averti potest. Hinc non inconcinne hic locum habet illud Poetæ:

*Principiis obsta, sero medicina paratur,*

*Cum mala per longas invaluere moras.*

§. 3. Hinc igitur si nobis tale corpus ejusmodi ætatis offertur, tum plethora minuenda; instituatur ergo V. S. serius vel tardius, prout videmus serius vel tardius ad ἀκμήν accedere, quæ pro ratione plethoræ moderanda. Sic si videmus colorem iterum splendidum faciēi, venas lividas & plenas, calorem paulo majorem natum, hæc iteranda. Non vero hujus repetitæ venæ sectionis quem tædeat, nam hic agitur de vita; nisi enim Hæmoptoë præcaveatur, plerumque Phthifici moriuntur.

Mallem vero eam vere & autumnō administrare; nam si sic bis in anno M. S. licet parca, celebretur, inde magna mutatio corpori inducitur; ea vero per aliquot annos continuanda, v. g. usque ad 25. ætatis annum vel ultra, nisi debilitas vel plethora aliud suadeat. Cum vero videmus illum hominem hanc ætatem prætergressum, nullumque magis metum Hæmoptoës adesse, tum V. S. non illico intermittenda, sed sensim sensimque est minuenda; mittendo tamen sanguinem bis in anno, tandem semel, donec videmus tutum esse eam plane omittere.

§. 4. Quod superest diætā absolvitur. Caveat sibi ab omni re motum circulatorium nimis augente; hinc diætā omnis acrimoniæ sit expers, maxime acria salsa vitet, a Baccho omnino vacet, ab omnibus spiritibus fermentatis stillatitiis abstineat: sed utatur pro potu sola cerevisia tenui, vel & herbis balsamicis roborantibusque, ipsi recenti & ferventi inditis, medicata reddita. Motus muscularis sit moderatus. Caveat sibi quoque ab ingestis nimis tenacibus, quæ non facile concoquuntur, sed ventriculum onerant; ut & a nimis pinguibus, dum oleosa tenacitate nocent. Hinc a lardo, carne sale & fumo piscibusve aëre & sale induratis, & omnibus digestu difficilibus abstineat; sed cibi sint boni succi, multi alimenti, citissimæ coctionis: hinc ova recentia opti-  
ma



ma sunt, imprimis a gallina adhuc tepentia, aqua & lacte; addito parum sachari, diluta, vel & forbilia valde dilute cocta.

Ex carniū generibus imprimis probantur pulli gallinacei juvenes, perdices, phasiani, caro vitulina, hœdina, agnina, &c. hæc horumque juscula cum oryza & oleribus cocta pro lubitu assumat: pisces etiam & cancos fluviatiles concedere licet. Ante omnia tamen diæta convenit oleracea, frumentacea, & imprimis lactea: sic lac-coquatur cum oryza, hordeo, avena, milio &c. pro appetitu ægri: sic & radices scorzon. sifaræ, tragopog. dauci, pastinacæ, cichorei, & similes egregii usus sunt, saltem hisce vesperi sit contentus, & a carne tum absteineat. Quantitas ratione virium determinanda, tantum modo assumat, ut se inde sentiat resectum, non vero torpidum nec ponderosum. Quod si vero æger valde debilis, parum, & repetitis vicibus tantum, quantum alias una vice assumisset, assumat.

§. 5. Coëterum cardo rei in eo versatur, ut simul systema vasorum, imprimis Pulmo reborentur: cum vero motus muscularis ad moderatum calorem & lene initium sudoris, & frictiones siccæ quidem corpus optime roborent, sed circulationem nimis augeant, pulmonesque onerent; hinc nulum hic tutius, efficacius & jucundius remedium, quam quod ægri corpus per aërem renovatum velociter feratur. Ubi incipiendum ab oscillatione Veterum, vel & vectioe in navi, si æger valde sit debilis: hoc exercitio per aliquot tempus continuato, in carpento vel sella portetur, dein in rhedam conscendat, & sic gradatim adscendendo, tandem equo vehatur, ubi quoque itinera quotidie magis & magis sunt protrahenda. Veruntamen, si non nimis sit debilis, vectio in equo illico imperetur, nam hoc exercitium omnibus præfero; sic enim SYDENHAM dicit: *Licet equo vehi Phthisicis præcipue conferat, tamen & itinera curru facta mirandos sane effectus quandoque ediderunt.*

§. 6. His exercitationibus aër continuo renovatur, semper novus & purus habetur, visque ejus in corpus nostrum &



& Pulmones augetur, vasis tanto majores vires adduntur, sicque corpus quasi intra prelum ponitur ab aëre fortius irruente. Sic enim semper ventum quasi adversum sentimus, & hinc omnia viscera & vasa per concussiones reciprocas maxime roborantur, & illud, quod alias sponte congestiones in viscera induxisset, resolvitur, omniaque nimis lenta & stagnantia in actum deducuntur: sicque species quasi frictionis toti systemati vasorum & viscerum applicatur, inde illi, qui citissime equo incedunt, valde incalescunt. Hinc non a vehementissima equitatione incipiendum, sed semper per gradus quotidie adscendendum, idque non illico post prandium vel coenam, sed 4. vel 5. horis post ultimum pastum; nam sic secundæ coctioni optime succurritur, alias enim crudum ex ventriculo nimis expellitur, Pulmoque debilis admodum premitur a ventriculo impleto. Corpore vero sic satis roborato motus musculares pro lubitu ægri concedi possunt: ubi iterum aurea regula est, ut semper a lenissimis, ut antea quoque dictum, incipiamus. Veruntamen, si ægri conditio id permittat, sola equitatio unicum & sufficiens roborans, eam continuando & augendo, donec videmus corpus omni effectu satis rigidum factum.

§. 7. Hæc sunt, quæ de prophylaxi dicenda habui, pauca admodumque simplicia. Hisce tamen rite observatis, suoque tempore administratis, mirandos inde effectus præstamus, & homines ex faucibus mortis quasi eripimus, quorum tota familia Phthisi demortua. Sed proh dolor! raro Medici de hoc morbo præcavendo consuluntur, sed tum demum si jam præsens est, ubi tum fere incassum ab arte medica expectantur miracula.

§. 8. Eadem requiruntur in consumptione Anglicana incipiente, ubi Pulmones leniter & sensim ab ingestis crudis onerari videmus: vel & si observamus ægrum tam debilem, ut nulla fiat humorum compactio, omniaque quasi perfluant, & modo sudori materiam præbeant. V. S. vero hic non prodest, quin potius plerumque noceat. Hinc omnia priora sunt repetenda, imo hic simul medicamenta roborantia, ob sum-

D

mam



nam notabilemque debilitatem, conveniunt: & hinc forsan MORTON corticem Peruvianum adeo laudat; sed & in his lente procedendum.

Coeterum majori cautela opus est: diæta sit strictior, imo sola lactea optime conducere, & in motu corporis a lenissimis incipiendum; nam, si a motu musculari inciperemus, illico anhelant, tremunt, & sæpe sic animi deliquia patiuntur, imo in Hæmoptoën incident. Nec quoque tutum est in his ab equitationibus incipere, sed a motu minimo gradatim, prout vires ægri ferunt & increscunt, adscendendum.

Hæc sunt omnia, quæ novi hic aliquid boni præstare.

§. 9. Si vero Medicus de hoc morbo in semine latente non consulatur, vel omnia hæc non rite & suo tempore administrentur, morbusque jam præsens, summæ artis est, imo vix possibilis cura.

§. 10. Cum vero plerumque prægressa Hæmoptoë Phthisis oriatur, hujusque sit præmonitor, consentiente BENNETO, hujus cura prælibanda.

§. 11. Ponamus igitur committi nobis *Cura Hæmoptoës* hominem, Hæmoptoë prius descripta per *Ἀφ᾽ ἑξῆς*, id est, ex erosione vasorum orta, laborantem; tum cura difficillima, summoque molimine illico tentandum, ut

1°. Rima in vase facta claudatur.

2°. Suppuratio inhibeatur.

3°. Nova Hæmoptoë præcaveatur.

§. 12. Primum obtinetur:

(α) M. S. quæ illico fiat, ut sanguis non tanta copia ad Pulmones feratur, ita ut vas ruptum se possit contrahere, inque pristinum, si fieri potest, retroire, hæcque repetenda tamdiu, donec crusta inflammatoria dispareat; imo, si requiritur, ter quaterve intra spatium octidui repetatur: coeterum ea, pro viribus ægri & ratione plethoræ, quod ex colore faciei, pulsu, & turgescencia venarum judicatur, est moderanda, quod unice a prudentia Medici dependeat.

§. 13. (β) Ligando majora vasa venosa: si ingens profluvium  
hoc



hoc indicat, tum illico applicentur ligaturæ supra talos summosque humeros, quod quoque CELsus hoc in casu laudat; nam sic venæ comprimuntur, non vero tam fortiter arteriæ, quæ interius tutius a Creatore in finem requisitum reconditæ sunt, sicque refluxus hujus sanguinis, qui aliter per hæc venas ad cor fluit & hinc ad Pulmones, pro tempore inhibetur, & circulatio per Pulmones minor redditur; omnis enim ars hic primo consistit in imminutione virtutis moventis. Ne vero hæ ligaturæ nimis adstringantur, vel nimis diu applicatæ teneantur, nam inde gangrænæ metus; hinc si primus impetus sanguinis per M. S. sedatus, ligaturæ solvendæ.

§. 14. Secundum obtinetur iisdem, impetum sanguinis compescendo & avertendo. Id quod post V. S. in genere fit per laxantia, lenientia, pediluvia, enemata mollia sæpius iterata; hinc SYDENHAM omnem spem in his, nempe V. S. & clysmatibus, collocat.

§. 15. In specie vero humores corrigendi, & suppuratio, quantum fieri potest, avertenda, per decocta lenia demulcentia, admixtis herbis balsaminis, (quibus speciatim recensendis non inhærebo) per emulsiones balsamicas, balsamosque lenes, ut sunt: olea hyperici, oliv. butyrum recens non salitum, &c. quorum omnium vices oleum amygdalarum dulcium recens pressum, palato adeo gratum, supplere potest: sic balsami ex dictis oleis parati hic quoque egregii usus sunt, nec minus balsamus, qui fit ex nucleis pistaciorum, & ex nucleis pini. Alii vero raro hic conveniunt, nam coeteri balsami, hic tantis encomiis laudati, nimis crassi, duri, admodumque calefacientes, deprehenduntur, quales sunt varii balsami sulphuris & similia, ut & therebinthina nimia copia data. Quæ, licet egregium balsamum constituat, imprimis quæ ex larice transfudat, parca tamen copia aliis medicamentis admiscenda, quia aliter nimis calefacit, & ut reliqui vim ventriculi destruit, & *ἀνορεξίαν* inducit: hinc præterea dicto balsamo & aliis semper aliquid admisceatur, quod impedit, ne oleositate nimis noceant; addantur ergo gummata oliban. ma-



stich. sarcocol. opopon. &c. quæ grata sua aromatica leniterque stimulante vi summos præstant effectus; nam resinosa tenacitate primis viis adhærent, dum interim calore corporis gratum balsamicum stimulum quaquavorsum dispergunt. Non vero hanc sententiam foveo, quod hæc sola sufficiant ad vulnus consolidandum, uti quidem hoc SYLVIVS de balsamo sulphuris tam pertinaciter affirmat; verum vix alio scopo serviunt, quam emolliendo, laxando, acreque temperando, nam in totum agunt, & loco affecto minime applicari possunt, ergo hic vim consolidandi non habent: & præterea licet loco affecto applicari possent, tamen hoc non efficerent; nam balsamus externe vulnus minime consolidat, sed aërem, ut peregrinum in vulnere hostem, & omnia heterogenea arcet, & sic tum natura consolidat, non balsamus. Causa vero, quare balsami hic tantum nomen meruerint, est, quia dati in Hæmoptoë a causa externa Phthisin avertunt, & morbum curant: sed & hi æque sine horum usu sponte sanati essent. Hi vero balsami hic nobis inserviant, ut & decocta sanguinem demulcentia prius laudata, ut sanguinem mollem blandumque & Pulmones complicabiles reddant, quo se a grumis sanguineis forsitan adhuc ibi hærentibus liberare possint.

§. 16. Verum si observamus aliquid sanguinis extravasati adhuc hære in Pulmone, quod scitur, si respiratio difficilis, pondusque in pectore sentitur, ut plerumque fieri solet, si nimis cito sputa sanguinea, ab intempestivo usu adstringentium, suppressa, ultimoque dimissa plerumque fiunt grumosa, tum syrupi pectorales expectorationem juvantes conveniunt: imo hoc in casu, ut Pulmo a sanguine effuso & forsitan concreto purgetur, SENNERTUS laudat poscam, id est, aquam cum aceto tepide datam, id quod præstat & oxymel; verum hæc modo bis vel ter ad aliquot cochlearia tepide summa cum cautela danda sunt, aliter metus, ne inde fluxus iterum augeatur. Quamprimum vero videmus satis Pulmones esse expurgatos, ab his calidis & aceto illico abstinendum: imo plerumque emollientia & laxantia sola hunc scopo sufficiunt.

§. 17.



§. 17. Adstringentibus tantis encomiis hic evectis non fridendum esse puto, secundum illorum sententiam, qui totum opus his absolvere fatagunt, existimantes, hæc specifica quædam vi rimam in vase factam claudere; maxime enim falluntur, nam hæc medicamenta, (ut paulo superius de balsamis dixi) in totum agunt: & præterea, si illæsis viribus loco affecto applicari, sanguinemque pulmonicum ingredi possent, peripneumoniam & mortem, in pulmonibus coagulum humorum inducendo, producerent: imo ex intempestivo horum usu sanguis effusus retinetur, putrescit, & Phthisin facit; vel & totum vasorum systema roborando, eo ipso calorem & motum augendo, Hæmoptoën augment. V. S. verò rite administrata, medicamentis supra notatis adhibitis, & pulmonibus repurgatis, leniter adstringentia adhibere licet, ne videamur ægrum negligere: & tum quodammodo prodesse possunt, quatenus roborant in totum & incrassant. Sed quamdiu metus Hæmoptoës adest, calorem augendo nocent; hinc non nisi summa cum prudentia, ac parca dosi (præprimis lapis hæmatitis, quia est fortissimum adstringens, nam agit ut ferrum) & non nisi admixto melle, ea præscribere convenit.

§. 18. Meliori vero jure hic laudantur terræ sigillatæ pingues, boli, sanguis draconis, &c. quæ præterea, quod humidum laxans & diluens absorbendo adstringunt, & incrassant, quoque omnem acrimoniam obtemperant & involvunt, hinc prosunt. Nam hic imprimis studendum, ut chylus blandus ad Pulmones feratur: quo enim leniores blandioresque humores ad vulnus, ut hic Hæmoptoë est considerata, appellant, eo minor fit suppuratio; aliter enim acria, stimulando fibras, motum & calorem, & inde suppurationem augment.

§. 19. Medicamenta vero, unicuique acrimoniæ contraria, satis nota sunt; hinc supervacaneum esset hæc recensere. In genere vero, si acrimonia alcalina peccat, leniter acida & acescentia præscribenda, & contra, acrimonia vero aromatica per aquosa & leniter acida corrigitur, acrimonia fa-



lina autem per demulcentia oleosa: & sic porro unicuique acrimoniæ prædominanti suis contrariis medicamentis succurrendum. Cum vero, uti jam diximus, imprimis salina acrimonia hic peccat, ea, si præsens, illico corrigenda.

§. 20. Purgantia vero, hic a nonnullis semper laudata, non probo, quia ventriculum turbant, circuitum augment, & Phthisin accelerant: uti quoque SYDENHAM affirmat, imprimis de repetita catharsi. Si vero a catarrho tenui & acri, in bronchum tendente, adest metus Hæmoptoës, tum pro aversione purgantia lenia, non tamen sæpius repetita, ut sunt ex cassia, manna, rheo, & vix plura, conveniunt. Hinc & BENNET, ingruente morbo, nempe congestione ad Pulmones incipiente, evacuationem diversionis causa, per minorativa, (quæ sunt dicta purgantia) suadet præcipiendam. Huic scopo etiam inserviunt apophlegmatismi lenes & errhina, ita tamen ut sternutationem non faciant: nam inde Pulmo maximum nixum ab aëre irruente & rarefaciente patitur; hinc leniter modo stimulando muci secretionem augeant, & ad nares determinant. Ita & in hunc finem, catarrho continuo infestante & ad Pulmones depluente, fonticuli profunt. Si vero sic diversioni studuimus, tum incrasantia lenia adhibenda, ut tenues acresque humores paulo inspissentur, ac simul leniter roborantia, ut fluxio avertatur: & sic hæc, in corpore Hæmoptoën passo, & ubi, catarrhis frequentibus Hæmoptoës vel ejus recidivæ metus, prodesse possunt. Hæc sic in transitu notare volui, quia omnes Auctores hæc laudant; sed nulli alii scopo, quam ubi diversioni incumbendum est, inserviunt: non vero si pus jam generatur, nam tum maxime quies requiritur, & corpus non turbandum, aliter nimium puris copia augetur.

§. 21. Denique nimia puris generatio maxime prohibetur quiete loci; nam si pars nimium movetur, certo certius summa oritur suppuratio, imo gangræna: hinc perfecta, quantum fieri potest, quies imperanda. Caveat sibi ab omni re, unde respirationes fiunt repetitæ & anhelationes, nam hinc Pulmonis motus augetur: caveat sibi ab omni motu Pulmoni vim in-



inferente; hinc risus inhibeat, & maxime tussis, quæ a titillatione nervorum a vase rupto & humore effuso orta, hinc adeo molesta, quam hic nullo alio remedio, quam anodinis & narcoticis, compescere possumus, quæ inde, repurgatis Pulmonibus, in quotidianum usum vocanda.

§. 22. Tertiæ indicationi sola iterum diæta & usu sex rerum non naturalium bene administrando satisfacere possumus. Hinc hic primo Pulmoni debili succurrendum per ea, quæ sine difficultate eum permeare & concoqui possunt; hinc imprimis lactea diæta convenit, nam lac, actionem ventriculi, intestinorum, nec non Pulmonis animalis jam passum, sine labore nutrit. Equidem non ignoro, quod lac per ventriculum & intestina immutatum in lactea haud transeat, quin semper coaguletur; attamen nil mali hic subesse posse putem: nam nos non desideramus illud colostrum, sed illud spirituosum proxime ad nutrimentum accedens. Lac vero foeminæ sanæ, ætatis integræ, ob analogiam, quia homo homini simillimus, omnibus præfertur, imprimis si suctu ex uberibus hauritur; nam tum subtiles illi spiritus, qui proxime ad ultimum nostrum alimentum accedunt, optime habentur, qui aliter in aëre & imprimis coctione avolant. Ad lac humanum proxime accedit asininum & equinum, dein caprinum, imo & lac bubulum fere idem præstat: ita tamen, ut, quantum fieri possit, adhuc tepens ab animalis calore bibatur; vel si sic haberi nequit, quam minime ab igne mutatum in vase exactissime clauso tepesfactum hauriatur. Animal vero sit sanum, integræ ætatis, herbis recentibus pastum; imo lac sic alterari potest nutriendo animal herbis ægro medicatis, ut æger nullo alio indigeat medicamento: hinc tempus verum huic diætæ accommodatissimum. Nil vero nisi tali lacte & lacticiiniis utatur, (a vino autem maxime abste-  
neat) addendo solum panem bis coctum, qui optimus: si æger hujus nimis ex continuo usu pertæsus, cum oryza, avena, hordeove coqui potest. Ea vero quantitate dandum, ut ventriculus bene ferre possit, hinc non nimis una vice assumendum. Potus quoque sit lac triplo aquæ dilutum, si æ-  
stas



stas est, hieme anatice sumatur: vel & serum lactis. Verum quia hi ægri plerumque debiles, coagulum lactis in ventriculo non resolvitur, unde BENNET usum lactis videtur improbare, dissecti cadaveris historiam narrans, ubi ventriculus & intestina coagulo lactis infarcta erant.

Sed hoc incommodum præcavemus addendo lacti parum sacchari vel mellis, tum enim coagulum tam durum non fit sed facile resolvitur: si vero videmus hominem, a lactis coagulo in ventriculo hærente, nauseabundum, tum ad hoc solvendum nullum præstantius habemus medicamentum, quam saponem Venetum, parca dosi cum lacte datum.

Hisce cum cautelis ægri sine incommodo hanc diætam ferre possunt.

§. 23. Coeterum aër, in quo hæret æger, sit moderate frigidus, siccus, maximeque vitet subitaneas aëris mutationes. Caveat sibi ab applicatione causæ calefacientis, sanguinemque rarefacientis, nec non a foco & lecto nimis calido; a vino, balneo, Venere abstineat, omnem motum muscularem vitet; caveat sibi a loquela, imprimis nimis acuta, a clamore, cantu, risu, tussi imprimis, quæ, cum a voluntate non dependeat, diacodiat, quamdiu metus recidivæ, sopienda, quæque medicamentis, quibus per totum diem utitur, addenda. Caveat sibi ab omni nixu corporis; hinc alvus non sit nimis dura, sed lubrica, & si non respondeat, clysmate molli eluenda est, nam respirationis vis utique requiritur ad alvum duram egerendam. Sic vivat in perfecta quiete, somnoque paululum indulgeat: denique ab omni animi affectu vacet; nam hi rodunt, ut, tinea vestem, maximeque hic nocet ira, mœror, & studia quæcunque, nimis anxie exculta, ut & omnis res quæ nobis nimis curæ cordique est; sic humores reddimus quiescentes & quasi emplasticos, & Hæmopotën præcavemus.

24. Si vero tam felices sumus, ut æger, hisce rite observatis, meliusculus esse cœperit, metusque Hæmoptoës absit; tum ad curam morbi imminentis, prius descriptam, deveniendum est.

§. 25.



§. 25. In his prolixus fui, quia Phthisis jam præsens ex tali causa vix curabilis, imo vix, si vera Hæmoptoë adest, Phthisis præcaveri potest. Non vero, si Hæmoptoë a causa externa est sine prædispositione, cura adeo difficilis: & non habent Medici, quod hic adeo se jactent, nam sic suam incusant ignorantiam; hæc enim sola quiete, & abstinencia ab omni acri calefaciente, per aliquod tempus servata, atque V. S. curatur.

§. 26. Ubi hæc omnia sero, vel frustra  
*Cura Phthiseos.* adhibita, tum fere desperata res est, non tamen ægri sunt derelinquendi; hinc, quæ restant, paucis, quantum fieri potest, absolvam. Itaque si vomica, ex signis prius datis, adesse deprehenditur, tum  
 1°. Ejus maturatio & ruptura ad vasa aërea promovenda.  
 2°. Vomica rupta, vel sponte aperta, illico ulcus ( $\alpha$ ) mundandum & detergendum, ( $\beta$ ) pus evacuandum, ( $\gamma$ ) sanguis contra infectionem purulentam muniendus, ( $\epsilon$ ) tandemque labia consolidanda.

3°. Nutrimenta ingerenda talia, quæ facile per Pulmones fluere subigique possunt.

4°. Symptomata mitiganda.

§. 27. 1°. Disruptio commodissime tentatur ad vasa aërea, quia, si in thorace aperitur, vix medelæ locus; hinc corpus ægri per aliquod tempus mollibus, laxantibus decoctis, & similibus alimentis, jusculis pinguibus implendum, vaporesque emollientes ad Pulmones applicandi, & per inspirationem hauriendi. Si sic satis molles Pulmones ad vasa aërea fecimus, & vomica non sponte aperitur, tum in prandio, ventriculo mollibus jusculis vinoque edentulo, ut HIPPOCRATES dicit, impleto, æger in rheda per strata lapidea, inæqualia, vehatur, & his concussionibus agitetur, ea spe, ut vomica sensim rumpatur ad vasa aërea, quod tum plerumque fit; nam sic ventriculo impleto, Pulmo jam mollis redditus in omni parte, exceptis vasis aëreis, premitur, & sic ruptura quoque ibi speranda. Verum si magna hæret vomica purulenta, tum metus est, ne æger, hac rupta, moriatur suf-



focatus, hinc periculum præmonere debemus, ne videamur ægrum interficere.

§. 28. 2°. Si ergo sic, vel sponte, ulcus apertum, tum (α) deterfioni & mundationi studendum, hinc, ut pus coctum ulceri respondeat, leniter maturantia ut & blanda deterfiva hic in usum quotidianum vocanda: quibus recensendis non immorabor; adeat L. B. *Viri Celeberrimi*, H. BOERHAAVE incomparabilem libellum *de materia medica*, ad caput de pneumonia, ubi omnia, huc pertinentia, tuta medicamenta fideliter recensentur, ita ut in his variare possimus, nam cura admodum diuturna. Hæc vero optime in decocto præscribuntur, addito melle (est enim mel adiaphorum, optimeque detergens & expectorationem simul juvans). Gummata vero illa aromatica, optime sub forma pulveris, vel pilularum, ante usum decocti assumendarum, præscribuntur, egregiique usus sunt; nam emplastica sua vi adhærente lenem balsamicum aromaticum stimulum sensim quaquavorsum dispergunt.

§. 29. Hic vero non nimis detergendum, fortia enim detergentia cane pejus & angue vitanda, nam Hæmoptoën faciunt: hinc semper calidioribus leniora & emollientia addenda, & sic secretio puris moderanda; nam a nimia secretionē puris nimis debilitantur, attamen pus ulceri respondere debet. Hoc vero moderamen videtur optime obtineri posse per evaporationes & suffitus, BENNETO adeo laudatos, quorum applicationis modum ad Pulmones tradit: sic vapores emollientes, maturantes, si puris secretio nimis parca; si vero nimium puris generatur, adstringentium gummatumque siccantium prunis injectorum suffitus hauriantur.

§. 30. (β) Sic secretionē moderata huic puri exitus conciliandus, per lenia expectorantia ad varios morbi status accommodanda. (1) Ubi demulcendum & lubricandum, trochisci bechici pectorales, succus glycyrrhizæ inspissatus, saccharum penidiatum, vel syrupi lenes pectorales in usum vocandi. (2) Si vero pus nimis crassum, leniter est incidendum: fumatur igitur hyssopus, majorana, thymus & similes herbæ,  
ho-



horumque syrupi, ut debili Pulmoni vires addantur, quo se a pure liberare possit. Non vero hæc nimia copia danda, quia exsiccant & calefaciunt, & sic novam Hæmoptoën facerent; hinc non nisi valde diluta, melle edulcorata, propinanda. Cum vero (3) stimulus requiratur, ad tussim excitandam, quodammodo aquosa sorbilia convenient, quibus vel acetum, vel vinum permisceatur, vel & oxymel Hippocratis sorbeatur; nam sic, stimulando nervos, tussim excitamus.

Ex horum iusta applicatione, prout status & conditio ægri & symptomata postulant, multum levaminis redundat.

§. 31. Hisce ergo ulceris fit deterfio, & exitus puri conciliatur, sicque simul (γ) sanguis munitur ab infectione huius; nam si pus retineretur, sanguini communicaretur: his enim non obstantibus, tamen semper aliquid per venas resorbentes sanguinem ingreditur. Hinc grate acida medicamentis prius recensitis miscenda, ut & lenia salina, (si acrimonia illa, quam prius accusavi, non magis peccat, ut raro solet) per quæ sanguis contra hanc infectionem purulentam & putredinem munitur. Imo diuretica, pus per vias urinæ excernendo, egregie sanguinem depurgant; hinc serum lactis, aquæ chalibeatæ, & similia hic adeo laudata, quasi sola in omni Phthisi sufficerent. Verum cum hic Pulmones debiles valde, hinc hæc diuretica non nisi parca copia adhibita conveniunt, aliter nimis humectant & debilitant.

§. 32. Cum vero sic, quantum fieri potuit, ulcus deterfimus, puri exitus datus, locusque depuratus, tum ultimo (δ) labia depurata consolidanda: quod fit per decocta traumatica, leniterque roborantia, quæ optime parantur ex herb. veronic. betonic. virga aur. &c. quæ præterea, quod lene aroma habent, leviter adstringunt, & sic, cum melle data, egregii usus sunt: ut & per suffimigia ex similibus antea laudata.

§. 33. Cum vero consolidationi ulceris maxime obsit tussis & motus, hinc ægro certum omni die tempus præfigendum,



dum, quo perfecte, quantum possibile, quiescat. Quonium vero nocte omnia silent, hinc vesperi quies imperanda, nec prius ventriculus nimis cibis onerandus, & hora 6. vel 7. vespertina cubitum eat, & ab omnibus animi affectibus vacans, quam quietissime, quantum possibile, dormiat. Tussis suis medicamentis finienda; hinc narcoticum vesperi, antequam lectum petit, semper propinandum: quæ medicamenta hinc consolidantia dicuntur, sic enim somnus imperatur, & locus in quiete, quantum fieri potest, retinetur, sicque perdit ut-cunque fit regeneratio, & sputa mane iterum cocta procedunt.

§. 34. Hæ sunt classes medicamentorum, quæ hic medicina subministrat: ubi nunc hæc, nunc illa præscribenda, pro conditione statuque ægri & symptomatibus urgentibus, (quod in unoquoque ægro optime judicatur) hinc & illud arbitrio Medici prudentis relinquendum.

§. 35. Nullum vero hic habemus efficacius remedium, quod huic indicationi fere in omnibus satisfacit, quam aëris novi purique ad Pulmones velocius iteratos appulsus: quodque obtinemus pervectiones in rheda, vel equitationes, si æger non nimis debilis; aliter a navigationibus incipiendum, donec priora ferre possit, tum deveniendum advectiones, maxime in equo, ubi gradatim spatia majora conficiat. Aër enim scoparum quasi & purgatorii in Pulmonibus vicem supplet, sicque optime detergit, materiam puris ad exteriora allicit, Pulmonesque depurgat, & simul corpus roborat. Per hoc remedium plus valemus, quam speciosis medicamentorum formulis ad tædium usque iteratis ac devoratis: imo, nullo respectu habito ad ullum medicamenti genus, hoc unum sufficit in Phthisi jam præsentē, ubi jam sudores nocturni & alia mala signa adfunt; nisi quod, Pulmonibus de die sic detergis & depurgatis, noctu, ut quies imperetur, paregoricum sit propinandum: sic ut huic medicamento acquiescere possimus. Imo SYDENHAM testatur, se aliquem, ubi diarrhœa jam accesserat, solo hoc remedio restituisse; *sed anulum prætergressis multo diutius in hoc exercitio persistendum.*



*dum, quam infra eam ætatem positis.*

§. 36. 3°. Tertiæ indicationi satisficit sola diæta lactea. Quia vero, uti arbitror, supra in cura Hæmoptoës de ea satis satisque jam actum sit, illi hic diutius non inhærebo. Quod si vero forsan quis hanc diætam ferre non possit vel nolit, tum juscula tenuia, facile meabilia, ex carne vitulina, vel ovilla, ut & decocta panis substituenda, cum usu decoctorum farinosorum pro cibo & potu, & tum quoque vinum parca copia concedi potest. Præstat tamen solus usus lactis sub conditionibus descriptis, nam optime nutrit, acrimoniam vitiosorum humorum temperat, parte serosa ulcus abstergit, ac butyracea humectat, & corporis exsiccationi resistit. Verum, ut tam strictam diætam servant, vix quidem opus habent, qui vectionibus se committunt.

§. 37. Hæc sunt omnia, quæ ars hic subministrat, & quibus ulcus cicatrice obducere conamur. Sed quis forsan hic rogaret, num putem, ægrum sic in pristinum restitui posse? His respondeo, admodum difficile esse, quia aër hic semper præsens arceri nequit, & præter motum respiratorium hic quoque tussis, ad ulcus a pure mundandum, requiritur, quæ labia ulceris sæpe iterum dilacerat: imo licet forsan consolidationem obtineremus, tamen in prædispositis sic virtus pulmoni non redditur, nec vasorum systemati suum requisitum robur additur. Præterea hic habemus summa contraindiantia: alimenta enim tenuia & facile digerenda quidem transmittuntur, sed vi Pulmonis & vasorum non compinguntur, hinc modo sudori materiam præbent; assumpta vero, si duriora fuerint, accumuluntur, & inde malum augetur. Si nimis mollia maturantia damus, tum nimium puris generatur, nimis debilitatur æger, imo inde diarrhœa illa colliquativa sæpe acceleratur. Si fortia detergentia, vel adstringentia propinamus, sæpe novam Hæmoptoën producimus: si calefacientia, spirituosæ, stimulantia injungimus, tum spiritus nimis excitantur, agitantur, imo æger sæpe suffocatur, ob nimium humorum ad Pulmones affluxum, vel Hæmoptoës recidivam patitur. Denique febris



laxantia & humectantia requirit, ulcus detergentia & siccantia postulat; sic ut putem, morbum hunc ex seminali labe, vel sensim a Consumptione Anglicana inductum, vix curabilem esse, nisi forsan a vectionibus quid boni sperandum sit.

§. 38. 4°. Ultimo de symptomatibus paucis agendum, imprimis cum existimem, Phthisin consummatam vix curam radicalem admittere: ergo vita ægro tolerabilior reddenda, mitigando symptomata. Qualia & quidem summopere urgentia sunt: (1) *Vomitus*. (2) *Tussis nimis molesta*. (3) *Febris Hæctica*. (4) *Anxietas*. (5) *Sudor*. (6) *Diarrhœa*.

§. 39. (1) *Vomitus* plerumque oritur a miasmate purulento, sanguini communicato, & ad hepar delato, sicque in ventriculum transpirante: hic nullis remediis obedit, nisi quod lenia arida quodammodo inducias pariant. Si a ventriculi fibris relaxatis viisque nimium lubricatis, ob olea, pingua, balsamica nimium exhibita, oritur, tum minimo motu ingesta versus superiora feruntur, hinc copia ingestorum eupeptorum dividenda, & simul leniter austeriora & acida, vel pro rei exigentia leniter spirituosiora aromatica, valde diluta propinanda. Cum vero a tussi nimis vehementi oritur, illa suis remediis sopienda.

§. 40. (2) Ad *Tussim* hanc paulo sedandam, sola diacodiata, ut supra jam monuimus, faciunt. Verum enim vero, ubi æger valde debilitatus in extremis hæret, summa cautela opus; nam sæpe respiratio inde insigniter anhelosa redditur, & æger mirum in modum debilitatur, ita ut sæpe ex nimio horum usu extremorum frigiditas, mentis vacillatio, & inexpectato opprobrio Medici, subitanea mors subsequatur.

Hinc hic parca manu debitis intervallis opiata, sed non nisi in forma liquida propinanda, & aliis medicamentis miscenda: hinc trochisci bechici, linctusque lenientes, demulcentes, expectorationem juvantes, in usum vocandi, hisque, pro rei exigentia, parum syrupi diacodii admiscendum.

§. 41. (3) *Febris Hæctica*, quæ definitur: quod sit febris habitualis, quæ quasi in habitum corporis abiit, ex causa san-



sanguinem corrumpente: hinc si cacochymia in toto hæret, tum est febris continua, continuato tramite decurrens; si vero oriatur ab ulcere Pulmonis, pus excernente, tum semper vesperi augetur, & quasi paroxysmum creat novum: & quia tum chylus novus a prandio ad Pulmones appellit, hinc, ad ulcerosa loca accedens, febrem accendit, eo quod non transmittitur, sed ab hac febre in pus mutatur. Unde ægri hi semper maxime conqueruntur de hac febre, & obnixè a Medico petunt, ut liberet a febre. In hoc casu MORTON corticem Peruvianum laudat, sed meo quidem judicio haud circumspecte; nam causa materialis manet, dum interim illud conamen naturæ, hoc obstaculum remove tentantis, cortice Peruviano supprimitur; hinc dispnoea summa sensim increscens producitur, & ægri moriuntur, ut ipsa scripta Auctoris testari videntur. Medicamenta autem hic nil juvant; omnis vero lapis movendus, ut chylus non tanta copia simul accedat ad Pulmones. Hinc tum æger omni hora cibos præscriptos, maxime lactinia, ea quidem quantitate, qua alias una vice usus fuisset, per totum diem divisim dosibus assumat; nam hic nil de alimentis subtrahendum, cum vires ægri maxime sint conservandæ. Hisce observatis, Pulmo parvam hanc quantitatem adhuc transmittere valet, sicque febrem hanc quodammodo præcavere possumus; quandoquidem autem præ debilitate vix adeo strictam diætam ferre possint, nec velint, nil tamen aliud hic medicina subministrat.

§. 42. (4) *Anxietas*, quæ oritur, quia Pulmo sanguinem omnem chylumque transmittere nequit; & inde prima illa instantis mortis perceptio, cordique nascitur obstaculum: quod cum se evacuare nequit, moritur homo. Tali autem in statu æger non derelinquendus, sed de hoc molestissimo & periculosissimo symptomate, si fieri potest, liberandus. In anxietate hac cardiaca stimulantia, a nonnullis semper laudata, maxime nocent, nam Pulmones magis onerant, malumque adaugent: solummodo hoc tempore illud crassum diluendum, ut perfluat, quod optime fit potu aqueo mellito, tepide hausto, v. g. potu coffee cum melle.

Et



Et hoc quidem pro tempore juvat, verum & sua incommoda habet, & malum non avertit; novo enim chylo ad Pulmones iterum appellente, eadem tragœdia luditur. Hinc cum eandem cum febre causam agnoscat, febris plerumque est pedissequa, & iisdem remediis utcunque præcavetur: nempe dividendo assumptorum facile digestibilium quantitatem in doses diversas. Denique ultimo illa anxietas oritur, quia illud paucum sanguinis adhuc reliqui Pulmonum vasa non magis implere, nec distendere potest, & tum quidem a potu stimulante, vel vino paulo reficiuntur; sed illico eadem tragœdia redit, & nullus medelæ, nec palliationi locus.

§. 43. (5) *Sudor*: febris hæc mane sudoribus solvitur; hinc, hac febre dicto modo utcunquæ sublata, quoque ille non adeo infestus.

Quia vero hic chylus non compingitur, & omnes humores sunt nimis tenues, hinc proclivitas illa in sudores semper adest, quam vix tollere possumus; nam medicamenta spirituosâ, aromatica, roborantia, sudores tales ex debilitate ortos quidem debellant, ea tamen vix audemus propinare, nisi pauca admodum copia, & valde diluta. Unicum, quod superest, a unctionibus & equitationibus expectandum, quod quoque SYDENHAM affirmat.

§. 44. (6) Tandem ultimo de *Diarrhœa* illa lethali colliquativa dicendum, de qua HIPPOCRATES dicit: *A tabe detenta alvi profluvium superveniens lethale*. Hinc puto in hoc morbo nulla præscribenda esse purgantia ob metum hujus. Præcavetur vero utcunque diæta lactea; si vero jam adest, conclamatum est de ægro, tum enim adstringentia dare non licet, opiata vero nimis debilitant: imo licet hæc eam suppressant, tamen inde dispnoea suffocativa & mors sequitur. Unicum, quod hic pro paucis diebus palliare potest, a clysmate anodino, paululum roborante, expectandum: injiciatur igitur post alvum depositam v. g. ℞. thereb. ℥j. theriac. ℥ij. vitel. ov. N. i. lactis dulcis, & aquæ, in qua ferrum exstinct. ana ℥ij. pro clystere. Simile & clyisma MORTON laudat



dat hoc in casu, ubi loco theriacæ diascordium recipitur: & hæc pro aliquo tempore quidem inducias faciunt, cœterum desperata res, & non ita multo post quam placidissime sine ullis symptomatibus, sæpe inter loquendum, diem obeunt supremum.

§. 45. Hæc sunt, quæ hic compendio de hoc morbo funestissimo dicere potui; medicamenta multa non addidi, sed, ex qua classe depromenda sint, modo subindicavi, ne disputationis limites transgrederer: obnixè igitur rogo L.B. ut hæc studiorum meorum primitias æqui bonique consulat, & sic huic dissertationi impono

F I N E M.



# A N N E X A.

## I.

*Nulla pars corporis sanguinem accipit , nisi prius per Pulmones iverit.*

## II.

*Omnia genera vasorum in Pulmonibus representantur.*

## III.

*Maximus calor in Pulmonibus generatur.*

## IV.

*Rubedo sanguinis videtur dependere a densitate,*

## V.

*Densitas illa dependet a vi solidorum in liquida, & vicissim.*

## VI.

*Ergo chylus, imprimis in Pulmonibus colorem rubrum accipit.*

## VII.



V I I.

*Nitrum aëreum non facit colorem sanguinis.*

V I I I.

*Sanguis in Phthificis minime densus & gravis.*

I X.

*Sanguis quo densior & specificè gravior, eo homo sanior, nisi adsit terrestre melancholicum.*

X.

*Aër sanguinem non ingreditur in Pulmone.*



10

2

... ..